

MUKANDA A NTUNDU WAKAFUNDELA PAULU ASI

TESALONIKA

Wambâtumela Moyo

1 Paulu, la Silivano, la Timote, Le Ekelezia ka la Tesalonika, weli le Unyashungu Shesu la le Khumadiondjo Jesu Kristu:

Ngandji ka mamba la ki wayali la nyu!

Eluwanelu ka Lukumu l'Ololo la Tesalonika

2 Shu tatukaka Unyashungu lusaka nshi tshe dikambu dianyú tshe, tatunyudimulaka lu alombelo asu. 3 Tatuhoka ulimu anyu wa mbetawo, la ekambelu ka ngandji ndu eteti k'elungamelu la ntundu ka Unyashungu le Khumesu Jesu Kristu. 4 Anyasu, elangimi a Unyashungu, shu mbeyaka esonamelu kanyu, 5 ne dia lukumu l'ololo lakayi le nyu, aha la diui tu, keli ndu lu wulu wa Nyuma k'Ekila, ndu la mbetawo ka wulu. Nyu mbeyaka wuhu akona w'antu wakatayaenyaka l'atei anyu dia dikambu dianyú. 6 Nyu nyakatúkuyaka, nyakukuyaka ndu la Akaya. 8 Ne dia diui dia Khumadiondjo diakadiangana uma le nyu, aha paka la Makedoniya la Akaya etu, keli mbetawo kanyu le Unyashungu kambeyama lu ahuli tshe. Okone shu hatuhumbi mvuta nduku diui. 9 Ne dia vame watutelaka antu dikambu diasu, uku akatakumi le nyu, la uku akanyakadimo le Unyashungu uma le dikishi, dia ntemola Unyashungu a lumu, a mete; 10 la dia nkungela On'andi uma l'ulungu, lakandulula uma lu nyoi, Jesu ndame, lambutushimbela uma lu kele kayayi.

Ulimu a Paulu l'Atei w'Asi Tesalonika

2 Anyasu, nyame mbeyaka nyati: Eotwelo kasu le nyu taki anyanya. 2 Keli lam'akawatusuya ntundu, ndu lam'akawatutsha sonyi la Filipi, uku weyanyu, shu takakikitala le Unyashungu asu, dia nyutela lukumu l'ololo la Unyashungu l'atei w'asui efula. 3 Ne dia daka diasu tadiaki munga, kuyanga kolo,

kuyanga lukesu, 4 keli uku akatetawoma le Unyashungu dia shu mbekama lukumu l'ololo, uku watasu. Shu hatuyangi ngenyangenya antu, keli tatuyangaka ngenyangenya Unyashungu latedikaka etema asu. 5 Vo kuntutana tata aui wa diandu dia wandulandula, uku weyanyu, kuyanga la engo ka nkumba okomiya, Unyashungu keli omenyi. 6 Shu kunyanga lutumbu uma le antu, kana uma le nyu, kuyanga uma le akina, keli takeyi nyûlela uku atumami wa Kristu. 7 Keli shu taki la memakana l'atei anyu, uku atûmbaka wali an'andi. 8 Shu takaleki nyulanga, taki la ongenongeno, aha dia nyusha lukumu l'ololo la Unyashungu lutu, keli takalangi ndu nyusha nyumu yasu, ne dia nyakayala elangimi asu a wulu.

Ambuwauhula Dia Ulimu Andi l'Atei Awo

9 Anyasu, nyu mbuhoka ulimu asu la pa kasu; shu takakambaka utshu la yanyi, dia shu tatukunyuyalela wutshu. Okone takanyusambishaka lukumu l'ololo la Unyashungu. 10 Nyu nyeko emenyi, ndu Unyashungu eko omenyi, uku akatatshaka akambu w'ekila, w'ololo ndu waha la unungu l'atei anyu, nyu wane wetawo. 11 Nyu mbeyaka uku akatanyutshela untu l'untu, uku atutshelaka shi an'andi. Shu takanyosengasengaka, takakikitshaka etema anyu, takanyutelaka diui, 12 dia nyu nkendakenda uku alanga Unyashungu, latunyetaka lu diulelu diandi la lu lutumbu landi.

Paulu Ambuka Unyashungu Lusaka ne Dia Kolamelu Yawo lu Asui

13 Dia dikambu ne, mbatutukaka Unyashungu lusaka aha mpeko. Ne dia lam'akanyalungula diui dia Unyashungu diakatanyutela, nyu kudietawo uku diui di'antu, keli nyakadietawo uku diui dia mete, diatukambaka l'etema anyu, nyu wane wetawo. 14 Anyasu, nyu nyakukuya Ekelezia wa Unyashungu wa la Judiya weli le Kristu Jesu, ne dia ndu nyu nyakasuyama pupu le asikanyu, uku akawasuyama le asi Juda. 15 Vo

wakadiaki Khumadiondjo Jesu ndu amvutshi, wakatutshanya, hawongenyanganya Unyashungu; wambutshikitana la antu tshe. 16 Vo wambutusihe dia shu mvutela asi wedja dia vo nshimbamela — dia vo ndudia yediko ya kolo yawo nshi tshe. Keli keke ka wulu ka Unyashungu kayali le wo l'ekumelu!

Saki ka Wulu ka Paulu ka Ntuwaenda

17 Anyasu, lu alimba kakatangana la nyu etenyi ka tshitshe, keli aha lu etema. Shu takatetemala la saki ka wulu dia menana la nyu; 18 ne dia shu takalangi ndja le nyu — keli dimi, Paulu, lakaleki nanga tena tshe — ku Satana akatushimbi. 19 Kakona keli elungamelu kasu, kana ongenongeno asu, kana dembo diasu dia kusu dia lutumbu? Aha nyu nyame mbeli osoku la ntundu k'enelo ka Khumesu Jesu lu eyelu kandi uka? 20 ne dia nyu nyeko lutumbu lasu la ongenongeno asu.

Paulu Ambâtumela Timote Dia Mbashikike la Mbakikitsha lu Mbetawo

3 Okone lam'akisu kumbeya mbikike ntu, shu takakani shati: Ndeka ololo shu ntshikala l'Atena shame. 2 Ku takatumi Timote, unyasu ukambi a Unyashungu lu lukumu l'ololo la Kristu, dia nyushikike, la dia nyukikitsha lu mbetawo kanyu. 3 Untu takananaki dia asui ane; ne dia nyame mbeyaka nyati: Shu takasonama lu dikambu ne. 4 Mete, lam'akisu la nyu, shu takatanyutedi shati: Dieli la su dia nswa. Dikambu diako diakatshama uku weyanyu. 5 Dia dikambu ne, ndu dimi, lam'akimi kumbeya mbikike, lakatumi Timote dia mbeya mbetawo kanyu. Dimi lakuki woma nti: Kana uhimbanyi akanyuhimbi, ku ulimu asu akayala anyanya.

Mbetawo Kawo Ambuyala Esambelu

6 Keli lam'akakalula Timote uma le nyu, ndi akatela lukumu l'ololo la mbetawo kanyu la ngandji kanyu; ndu ati: Nyu nyatutuhoka, la nyakalangi ntena, uku akatalangi nyena. 7 Anyasu, dia dikambu ne, mbakatakikitshama le nyu lu lunyangu ndu lu asui asu tshe uma lu mbetawo kanyu. 8 Ne dia kakiane shu teko la lumu, naka nyu nyambushikimala le Khumadiondjo. 9 Lusaka lakona lanyukelasu Unyashungu ne dia ongenongeno tshe weli la su le nyu la ntundu ka Unyashungu asu? 10 Utshu la yanyi mbatutolombaka dia shu mena dundji dianyu, dia nduwanya akambu wutshikadi lu mbetawo kanyu.

Ambâlobela Unyashungu

11 Unyashungu asu Shesu ndame, la Khumesu Jesu, watolombole lu mbuka kasu utsha le nyu. 12 Khumadiondjo anyuhamia, ndu anyuludia la ngandji untu la nyandi untu la unyandi, ndu le antu tshe, uku anyulangasu. 13 Okone ndi ashikike etema anyu waha la unungu lu akambu w'ekila la ntundu ka Unyashungu asu, Shesu, lu eyelu ka Khumesu Jesu la ekilami andi tshe.

Paulu Ambâkokomiya Dia Vo Ndjala la Ekidiamelu

4 Anyasu, diui diasu dia ndjihelu ne shati: Tambunyosengasenga ndu tambunyokokomiya le Khumadiondjo Jesu shati: Uku akatanyetsha lama nkendakenda, ndu lama ngenyanganya Unyashungu, uku watunyokendakendaka, dia nyu ntetemala nkendakenda wuhu ako, 2 ne dia nyu mbeyaka wuhu w'okende wakatanyusha uma le Khumadiondjo Jesu. 3 Ne dia dikambu ne, mbeli lulangu la Unyashungu, ekidiamelu kanyu: dia nyu ntuna munanyi. 4 Dia untu l'untu mbeya ndjakimela lu akambu w'ekidiamelu la wa kenemo, 5 aha la saki ka munanyi, uku asi wedja waheyi Unyashungu; 6 dia untu tanganelaki, la tatshelaki unyandi kolo lu dikambu ne: ne dia Khumadiondjo eko osomboyishi lu akambu ane tshe, uku akatanyewula, ndu akatanyutela ntundu. 7 Ne dia Unyashungu kunteta dia shu ntsha akambu wa mindu, keli dia shu ntsha akambu w'ekidiamelu. 8 Osoku one latuna diui ne, hatuni diui di'untu, keli ambutuna diui dia Unyashungu, latunyushaka Nyuma k'Ekila kandi.

Nyukani Ngandji

9 Keli lu dikambu dia mbukana la anyanyu ngandji, nyu hanyuhumbi untu nyufundela, ne dia nyu nyame nyaketshama uma le Unyashungu dia mbukana ngandji. 10 Mete, nyu nyatutshelaka anyanyu wa la Makedoniya tshe wuhu ako. Anyasu, tambunyokokomiya dia nyu ntetemala mbukana ngandji; 11 la dia nyu nyanga ndjala la ki, la dia untu l'untu ndjatshela akambu andi, la dia nkamba l'anya andi, uku akatanyutela. 12 Okone nyu nyayeya nkendakenda ololo lu ashu w'antu wahatetawo, ndu hanyeya mpumba engo.

Eyelu ka Khumadiondjo, la Eulwelu ka Wawo

13 Anyasu, shu nangaka nyu mbeya dikambu dia wane wakavu, diaha nyu

1 TESALONIKA

ndjala la lonyangu uku akina, wane waha la elungamelu. 14 Naka shu tambetawo shati: Jesu akavu ndu akulo, okone ndu wane wakavu kame la Jesu, Unyashungu ayuwaela kame la ndi. 15 Shu tambunyutela dia diui dia Khumadiondjo shati: Shu wane weli la lumu, tayutshikala edja ndu lam'ayuya Khumadiondjo, hatutsho la ntundu ka wane wakavu. 16 Ne dia Khumadiondjo ndame ayuhulo uma l'ulungu, la dielu, la diui dia ondjelo a wuki, kame la pungi ka Unyashungu. Wane wakavu le Kristu, wayulo ntundu. 17 Ku shu wane weli la lumu, wutshikadi, tayosama kame la wo lu wangi, la ntusangana la Khumadiondjo l'ulungu. Osoku tayuyala pundju le Khumadiondjo. 18 Okone nyukikitshanya la aui ane.

5 Anyasu, lu dikambu dia tena la deku, nyu hanyuhumbi untu nyufundela. 2 Ne dia nyame nyambushihudia ololo nyati: Lushi la Khumadiondjo layuya uku atuyakaka uvi l'utshu. 3 Lam'ata antu vati: Eko ki la lutui tshitshi, ku elanyelu ka shashimuya kayuya le wo, uku atuyakaka lono le umuntu leli la diemi; vo hawuhanda nduku yema. 4 Keli nyu, anyasu, nyaha lu udjima, okone lushi lako halunyutana uku uvi. 5 Ne dia nyu tshe nyeko ana wa usasi, la wa yanyi. Shu taha wa utshu, kuyanga wa udjima. 6 Okone tatulalaki djo uku akina, keli tosene, tuyali ki. 7 Ne dia wane walala djo, watulalaka l'utshu; la wane watudjoka, watudjoka l'utshu. 8 Keli shu, lam'esu wa yanyi, tuyali ki, tolote engawo ka mbetawo la ngandji; tulimbe dembo dia kusu la elungamelu ka panda. 9 Ne dia Unyashungu kuntosonola dia ntusuya la kele, keli dia ntusha panda le Khumesu Jesu Kristu, 10 lakatuvwela, ne dia shu ndjala kame la ndi, lam'esu lu nsena, kana lam'esu lu djo. 11 Okone nyukikitshanya, ndu nyudianya, uku watshanya.

Alaku Amotshi

12 Anyasu, tambunyosengasenga dia nyu mbeya wane watutshaka ulimu l'atei anyu, weli ladiku dianyu le Khumadiondjo, watunyewulaka. 13 Nyalemia otekoya la ngandji, dia ulimu watshawo. Nyuyali la ki, l'atei anyu. 14 Anyasu, tambunyosengasenga ntu shati: Nyewuli akanga w'efutanu, nyukikitsha akanga w'etema a weodu, nyusukeli wane weli weodu, nyuyali la memakana le antu tshe. 15 Nyewo, untu tasomboyaki ukina kolo kandi, keli nyuyelaki akambu w'ololo nshi tshe, untu la unyandi untu la unyandi. Nyutshelaki antu tshe ololo. 16 Nyongenangenaki nshi tshe; 17 nyutetemalaki nomba; 18 nyukaki lusaka lu akambu tshe, ne dia osoku mbeli lulangu la Unyashungu le nyu le Kristu Jesu. 19 Tanyudimaki Nyuma; 20 tanyonyolaki aui w'amvutshi. 21 Nyedikaki akambu tshe: nyukimeli weli ololo; 22 nyukimo wehu tshe w'akambu wa kolo.

Paulu Ambâlombela Unyashungu: "Ndi Eko la Kolamelu"

23 Unyashungu wa ki ndame, anyukidia tshe! Nyumu yanyu, la etema anyu ndu alimba anyu walamami ololo ndu aha la unungu l'eyelu ka Khumesu Jesu Kristu! 24 One lanyeta, eko la kolamelu, ndi ayutsha wuhu ako.

25 Anyasu, nyutolombelaki.

Paulu Ambâtumela Moyo

26 Nyusha anyasu tshe moyo la ononanelu w'ekila.

27 Dimi lambunyutshibia le Khumadiondjo dia nyu mbalela anyasu tshe mukanda one.

Ambâtshokola

28 Ngandji ka mamba ka Khumesu Jesu Kristu, kayali la nyu!